



藏書儒臣傳卷三十六

詞學儒臣

賈誼

賈誼，雒陽人也。年十八，以能誦詩書，屬文稱於郡中。河南
守吳公聞其秀材，召置門下，甚幸愛之。文帝立，聞河南守吳
公治平爲天下第一，故與李斯同邑，而嘗學事焉。乃徵吳
公爲廷尉。廷尉乃言賈誼。文帝召誼爲博士。是時誼年二
十餘，最少。每詔令議下，諸老先生未能言。誼盡爲之對，人
人各如其意所出。於是文帝悅之，超遷，歲中至太中大夫。
誼以爲漢興二十餘年，天下和洽，宜改正朔，易服色，定官

此所以爲賈生也

名興禮樂、乃草具其儀法、色上黃、數用五、爲官名、悉更奏

○直○老○子○矣○妙○共○

之、文帝謙讓未遑也、然諸法令所更定、及列侯就國、其說

處○皆○聽○

皆誼發之、於是天子議以誼任公卿之位、絳灌、東陽侯馮

敬之屬、盡害之、乃毀誼曰、雒陽之人、年少初學、專欲擅權、

罪○當○矣○

紛亂諸事、於是天子不用其議、以誼爲長沙王太傅、誼旣

以謫去、意不自得、及渡湘水、乃爲賦以弔屈原、爲長沙傅

三年、有服飛入其舍、誼自傷、又作服賦以自廣、又歲餘、文

帝思誼、徵之、至入見、上方受釐、坐宣室、上因感鬼神事而

思○說○者○此○

問鬼神之本、誼具道所以然之故、至夜半、文帝前席、旣罷、

○真○老○子○

曰、吾久不見賈生、自以爲過之、今不及也、乃拜誼爲梁懷

王勝太傅懷王上少子愛而好書故令誼傳之數問以得失是時匈奴強侵邊天下初定制度踈濶諸侯王僭擬地過古制淮南濟北王皆爲逆誅誼數上䟽陳政事多所欲匡建云居數年梁王勝墜馬死亡子誼自傷爲傳無狀常哭泣後歲餘亦死賈生之死年三十三矣孝武初立舉賈生之孫二人至郡守賈嘉最好學世其家誼所上治安策等見漢書不錄也

賈山

賈山潁川人也孝文時言治亂之道借秦爲諭名曰至言其略曰臣聞忠臣之事君也言切直則不用而身危不切

直則不可以明道故切直之言明主所欲急聞忠臣之所
以蒙死而竭知也地之磽者雖有善種不能生焉江皐河
瀕雖有惡種無不猥大故地之美者善養禾君之仁者善
養士雷霆之所擊無不摧折者萬鈞之所壓無不糜滅者
今人主之威非特雷霆也勢重非特萬鈞也開道而求諫
和顏色而受之用其言而顯其身士猶恐懼而不敢自盡
又况於縱欲恣行惡聞其過乎震之以威壓之以重則雖
有堯舜之智孟賁之勇豈有不摧折者哉如此則人主不
得聞其過失弗聞則社稷危矣昔者秦政力并萬國富有
天下破六國以爲郡縣築長城以爲關塞秦地之固大小

之執輕重之權其與一家之富一夫之強胡可勝計也然而兵破於陳涉地奪於劉氏者何也秦王貪狼暴虐殘賊天下窮困萬民以適其欲也昔者周盖千八百國以九州之民養千八百國之君用民之力不過歲三日什一而籍君有餘財民有餘力而頌聲作秦皇帝以千八百國之民自養力罷不能勝其役財盡不能勝其求一君之身耳所以自養者馳騁弋獵之娛天下弗能供也勞罷者不得休息饑寒者不得衣食亡罪而死刑者無所告訴人與之爲怨家與之爲讐故天下壞也秦皇帝身在之時天下已壞矣而弗自知也不自知者何也天下莫敢告也其所以莫

敢告者何也。亡輔弼之臣，亡進諫之士，是以道諛，媮合苟容。比其德，則賢於堯舜；課其功，則賢於湯武。天下已潰而莫之告也。詩曰：匪言不能，胡此畏忌。聽言則對，譖言則退。此之謂也。又曰：濟濟多士，文王以寧。天下未嘗無士也。然而文王獨以寧者，何也？文王好仁，則仁興；得士而敬之，則士用。故臣下莫敢不竭力盡死以報其上，功德立於後世而令聞不亡也。今陛下念所以昭光洪業，休德使天下舉賢良方正之士，天下皆訢訢焉。曰：將興堯舜之道。三王之功矣。天下之士莫不精白以承休德。今方正之士皆在朝廷矣。又選其賢者，使爲常侍諸吏，與之馳驅射獵，一日再

三出臣恐朝廷之解弛百官之墮於事也陛下卽位親自
勉以厚天下臣聞山東吏布詔令民雖老羸癯疾扶杖而
往聽之願少須臾毋死思見德化之成今從豪俊之臣方
正之士直與之日日獵射擊兔伐狐以傷大業絕天下之
望臣竊悼之古者大臣不得與宴游方正修潔之士不得
從射獵使皆務其方以高其節則羣臣莫敢不正身修行
盡心以稱大禮誠不如此則行日壞而榮日減矣夫士修
之於家而壞之於天子之庭臣竊愍之陛下與衆臣宴游
與大臣方正朝廷論議夫游不失樂朝不失禮議不失計
軌事之大者也其後文帝除鑄錢令山復上書諫以爲錢

者亡用器也。而可以易富貴。富貴者人主之操柄也。令民爲之。是與人主共操柄。不可長也。其言多激切。善指事意。故其後復禁鑄錢云。

枚乘枚臯

枚乘字叔。淮陰人也。爲吳王濞郎中。吳王之初。怨望謀爲逆也。乘奏書諫曰。臣聞得全者全昌。失全者全亡。舜無立錐之地。以有天下。禹無十戶之聚。以王諸侯。湯武之土。不過百里。上不絕三光之明。下不傷百姓之心者。有王術也。故父子之道。天性也。忠臣不避重誅。以直諫。則事無遺策。功流萬世。臣乘願披腹心而效愚忠。唯大王少加意。念惻。

但○之○心○於○臣○乘○言○夫○以○一○縷○之○任○係○于○鈞○之○重○上○縣○無○極○
之○高○下○垂○不○測○之○淵○雖○甚○愚○之○人○猶○知○哀○其○將○絕○也○馬○方○
駭○鼓○而○驚○之○係○方○絕○又○重○鎮○之○係○絕○於○天○不○可○復○結○隊○入○
深○淵○難○以○復○出○其○出○不○出○間○不○容○髮○能○聽○忠○臣○之○言○百○舉○
必○脫○必○若○所○欲○爲○危○於○纍○卵○難○於○上○天○變○所○欲○爲○易○於○反○
掌○安○於○泰○山○今○欲○極○天○命○之○壽○敝○無○窮○之○樂○究○萬○乘○之○執○
不○出○反○掌○之○易○以○居○泰○山○之○安○而○欲○乘○纍○卵○之○危○走○上○天○
之○難○此○愚○臣○之○所○以○爲○大○王○惑○也○人○性○有○畏○其○景○而○惡○其○
跡○者○卻○背○而○走○迹○愈○多○景○愈○疾○不○知○就○陰○而○止○景○滅○迹○絕○
欲○人○勿○聞○莫○若○勿○言○欲○人○勿○知○莫○若○勿○爲○欲○湯○之○滄○一○人○

炊之、百人揚之、無益也、不如絕薪止火而已、不絕之於彼、而救之於此、譬猶抱薪而救火也、養由基、楚之善射者也、去楊葉百步、百發百中、楊葉之大、加百中焉、可謂善射矣、然其所止、乃百步之內耳、比於臣乘、未知操弓持矢也、福生有基、禍生有胎、納其基、絕其胎、禍何自來、泰山之霤穿石、單極之統斷幹、水非石之鑽、索非木之鋸、漸靡使之然也、夫銖銖而稱之、至石必差、寸寸而度之、至丈必過、石稱丈量、徑而寡失、夫十圍之木、始生如蘖、足可搔而絕、手可擢而拔、據其未生、先其未形也、磨礱底厲、不見其損、有時而盡、種樹畜養、不見其益、有時而大、積德累行、不知其善、

有時而用棄義背理不知其惡有時而亡臣願大王孰計而身行之此百世不易之道也吳王不納乘等去而之梁從孝王游景帝卽位御史大夫鼂錯爲漢定制廢損削諸侯吳王遂與六國謀反舉兵西鄉以誅錯爲名漢聞之斬錯以謝諸侯枚乘復說吳王曰昔者秦西舉胡戎之難北備榆中之關南踞羌笮之塞東當六國之從六國乘信陵之籍明蘇秦之約厲荊軻之威并力一心以備秦然秦卒禽六國滅其社稷而并天下是何也則地利不同而民輕重不等也今漢據全秦之地兼六國之衆修戎狄之義而南朝羌笮此其與秦地相什而民相百大王之所明知也

今夫讒諛之臣爲大王計者、不論骨肉之義、民之輕重、國之大小、以爲吳禍、此臣所以爲大王患也。夫舉吳兵以訾於漢、譬猶蠅蚋之附羣牛、腐肉之齒利劍、鋒接必無事矣。天子聞吳率失職、諸侯願責先帝之遺約、令漢親誅其三。公以謝前過、是大王之威加於天下、而功越於湯武也。夫吳有諸侯之位、而實富於天子、有隱匿之名、而居過於中國。夫漢并二十四郡、十七諸侯、方輪錯出、運行數千里、不絕於道、其珍怪不如東山之府、轉粟西鄉、陸行不絕、水行蒲河、不如海陵之倉、修治上林、雜以離宮、積聚玩好、圜守禽獸、不如長洲之苑、游曲臺、臨上路、不如朝夕之池、深壁

高壘副以關城。不如江淮之險。此臣之所以爲大王樂也。今大王還兵疾歸。尚得十半。不然。漢知吳之有吞天下之心也。赫然加怒。遣羽林黃頭循江而下。襲大王之都。魯東海絕吳之饒道。梁王飭車騎習戰射。積粟固守。以備榮陽。待吳之饑。大王雖欲反都。亦不得已。夫三淮南之計。不負其約。齊王殺身以滅其跡。四國不得出兵其郡。趙囚邯鄲。此不可掩。亦已明矣。大王已去千里之國。而制於十里之內矣。張韓將北地。弓高宿左右。兵不得下壁。軍不得大息。臣竊哀之。願大王孰察焉。吳王不用。卒見禽滅。漢旣平七國。乘由是知名。景帝召拜乘爲弘農都尉。乘久爲大國上。

賓與英俊並游，得其所好，不樂郡吏。以病去官，復游梁。梁客皆善屬辭賦，乘尤高。孝王薨，乘歸淮陰。武帝自爲太子，聞乘名，及卽位，乘年老，乃以安車蒲輪徵乘。道死，詔問乘子無能爲文者。後乃得其孽子皐，皐字少孺。乘在梁時，取皐母爲小妻。乘之東歸也，皐母不肖，隨乘，乘怒，分皐數千錢，留與母居。年十七，上書梁共王，得召爲郎。三年，爲王使，與冗從爭，見讒惡，遇罪，家室沒入。皐亡至長安，會赦，上書北闕，自陳。枚乘之子，上得之大喜，召入見，待詔。皐因賦殿中，詔使賦平樂觀，善之，拜爲郎。使匈奴，皐不通經術，詆笑類俳倡，爲賦頌，好嫚戲，以故得媼，黷貴幸，比東方朔、郭舍。

人等而不得比嚴助等得尊官武帝春秋二十九乃得皇子羣臣喜故皐與東方朔作皇太子生賦初衛皇后立皐奏賦以戒終皐爲賦善於朔也從行至井泉雍河東東巡狩封泰山塞決河宣房游觀三輔離宮館臨山澤弋獵射馭狗馬楚鞠刻鏤上有所感輒使賦之爲文疾受詔輒成故所賦者多司馬相如善爲文而遲故所作少而善於皐皐賦辭中自言爲賦不如相如又言爲賦乃俳見視如倡自悔類倡也故其賦有詆嫫東方朔又自詆嫫其文骯髒曲隨其事皆得其意頗詼笑不甚閑靡凡可讀者不二十篇其尤嫚戲不可讀者尚數十篇

鄒陽

鄒陽客游、以讒見禽、恐死而負累、乃從獄中上書曰、臣聞忠無不報、信不見疑、臣常以爲然、徒虛語耳、昔者荆軻慕燕丹之義、白虹貫日、太子畏之、衛先生爲秦畫長平之事、太白蝕昴、而昭王疑之、夫精變天地、而信不喻兩主、豈不哀哉、今臣盡忠竭誠、畢議願知、左右不明、卒從吏訊、爲世所疑、是使荆軻衛先生復起、而燕秦不悟也、願大王孰察之、昔卞和獻寶、楚王刖之、李斯竭忠、胡亥極刑、是以箕子佯狂、接輿辟世、恐遭此患也、願大王孰察卞和李斯之意、而後楚王胡亥之聽、無使臣爲箕子接輿所笑、臣聞比干

剖心子胥鳴夷臣始不信乃今知之願大王孰察以加憐
焉諺曰有白頭如新傾蓋如故何則知與不知也故昔樊
於期逃秦之燕藉荊軻首以奉丹之事王奢去齊之魏臨
城自剄以却齊而存魏夫王奢樊於期非新於齊秦而故
於燕魏也所以去二國死兩君者行合於志而慕義無窮
也是以蘇秦不信於天下而爲燕尾生白圭戰亡六城爲
魏取中山何則誠有以相知也蘇秦相燕燕人惡之於王
王按劍而怒食以駃騠白圭顯於中山中山人惡之魏文
侯文侯投之以夜光之璧何則兩主二臣剖心折肝相信
豈移於浮辭哉故女無美惡入宮見妒士無賢不肖入朝

見嫉。昔者司馬喜黷脚於宋，宰相中山范曄摺脇折齒於魏，卒爲應侯。此二人者，皆信必然之畫，捐朋黨之私，挾孤獨之位，故不能自免於嫉妒之人也。是以申徒狄自沈於河，徐衍負石入海，不容於世，義不苟取，比周於朝以移主上之心，故百里奚乞食於路，繆公委之以政，甯戚飯牛車下，而桓公任之以國。此二人者，豈借宦於朝，假譽於左右，然後二主用之哉？感於心，合於行，親於膠漆，昆弟不能離，豈惑於衆口哉？故偏聽生姦，獨任成亂。昔者魯聽季孫之說，逐孔子；宋聽子罕之計，囚墨翟。夫以孔墨之辯，不能自免於讒諛，而二國以危，何則？衆口鑠金，積毀銷骨也。是以

秦用戎人由余而霸中國、齊用越人蒙而彊威宣、此二國
豈拘於俗、牽於世、繫阿偏之辭哉、公聽並觀、垂名當世、故
意合則胡越爲昆弟、由余越人蒙是矣、不合則骨肉出逐
不收、朱象管蔡是矣、今人主誠能用齊秦之義、後宋魯之
聽、則五霸不足稱、三王易爲也、是以聖王覺寤、捐子之之
心、而能不說於田常之賢、封比干之後、修孕婦之墓、故功
業復就於天下、何則、欲善無厭也、夫晉文公親其讐、彊霸
諸侯、齊桓公用其仇、而一匡天下、何則、慈仁慤勤、誠加於
心、不可以虛辭借也、至夫秦用商鞅之法、東弱韓魏、兵彊
天下、而卒車裂之、越用大夫種之謀、禽勁吳、霸中國、而卒

誅其身、是以孫叔敖三去相而不悔、於陵仲子辭三公爲人灌園、今人主誠能去驕傲之心、懷可報之意、披心腹、見情素、墮肝膽、施德厚、終與之窮達、無愛於士、則桀之狗可使吠堯、而蹠之客可使刺由、况因萬乘之權、假聖王之資乎、然則荆軻之湛七族、要離之燔妻子、豈足道哉、臣聞明月之珠、夜光之璧、以闇投人於道路、人無不按劍相眄者、何則、無因而至前也、蟠木根柢、輪囷離詭、而爲萬乘器者、何則、以左右先爲之容也、故無因至前、雖出隋侯之珠、夜光之璧、猶結怨而不見德、有人先談、則枯木朽株、樹功而不忘、今夫天下布衣窮居之士、身在貧賤、雖包堯舜之術、

挾伊管之辯、懷龍逢比干之意、欲盡忠當世之君、而素無
根柢之容、雖竭精思、欲開忠信、輔人主之治、則人主必有
按劍相眄之跡、是使布衣不得爲枯木朽株之資也。是以
聖王制世御俗、獨化於陶鈞之上、而不牽於卑亂之語、不
奪於衆多之口、故秦皇帝任中廢子蒙嘉之言、以信荊軻
之說、而匕首竊發、周文王獵涇渭、載呂尚而歸、以王天下、
故秦信左右而殺周用、烏集而王、何則、以其能越轡拘之
語、馳域外之議、獨觀於昭曠之道也。今人主沈於諂諛之
辭、牽於帷裳之制、使不羈之士與牛驥同皁、此鮑焦所以
忿於世而不留富貴之樂也。臣聞盛飭入朝者、不以利汙

藏書
義砥礪名號者、不以欲傷行、故縣名勝母、而魯子不入、邑
號朝歌、而墨子迴車、今欲使天下寥廓之士、攝於威重之
權、主於位勢之貴、故回面汙行、以事諂諛之人、而求親近
於左右、則士伏死堀穴巖藪之中耳、安肯有盡忠信而趨
闕下者哉、

嚴助

嚴助、會稽吳人、嚴夫子子也、郡舉賢良、對策百餘人、武帝
善助對、繇是獨擢助爲中大夫、後得朱買臣、吾丘壽王、司
馬相如、主父偃、徐樂、嚴安、東方朔、枚臯、膠倉、終軍、嚴蔥奇
等、並在左右、是時朝廷婁舉賢良文學之士、公孫弘起徒

步數年至丞相、開東閣、延賢人與謀議、奏言國家便宜、上令助等與大臣辯論、中外相應、以義理之文、大臣數詘其尤親幸者、東方朔枚臯嚴助、吾丘壽王、司馬相如、相如常稱疾避事、朔臯不根持論、上頗俳優畜之、唯助與壽王見任用、而助最先進、建元三年、閩越舉兵圍東甌、東甌告急於漢、時武帝年未二十、以問太尉田蚡、蚡以爲越人相攻擊其常事、又數反覆、不足煩中國往救也、自秦時棄不屬、於是助詰蚡曰、特患力不能救、德不能覆、誠能何故棄之、且秦舉咸陽而棄之、何但越也、今小國以窮困來告急、天子不振、尚安所愬、又何以子萬國乎、上曰、太尉不足與計、

吾新卽位，不欲出虎符發兵郡國，乃遣助以節發兵會稽。會稽守欲距法，不爲發。助乃斬一司馬諭意指，遂發兵浮海救東甌。未至，閩越引兵罷。後三歲，閩越復興兵擊南越。南越守天子約，不敢擅發兵。而上書以聞。上多其義，大爲發興，遣兩將軍將兵誅閩越。淮南王安上書諫，是時漢兵已出踰嶺，適會閩越王弟餘善殺王以降。漢兵罷，上嘉淮南之意，美將卒之功，乃令嚴助諭意風指於南越。南越王頓首謝罪，卽遣太子隨助人侍助還。又使諭淮南，助由是與淮南王相結。旣還，上大說。因問助居鄉里時，助對曰：「家貧，爲友壻，富人所辱。上問所欲，對願爲會稽太守。於是拜

爲會稽太守數年不聞問上賜書曰制詔會稽太守君厭承明之廬勞侍從之事懷故土出爲郡吏會稽東接於海南近諸越北枕大江間者濶焉久不聞問具以春秋對毋以蘇秦從橫助恐上書謝願奉三年計最詔許之因留侍中有奇異輒使爲文及作賦頌數十篇後淮南王來朝厚賂遺助交私論議及淮南王反事與助相連上薄其罪欲勿誅廷尉張湯爭以爲助出入禁門腹心之臣而外與諸侯交私如此不誅後不可治助竟棄市

朱買臣

朱買臣字翁子吳人也家貧好讀書不治產業常艾薪樵

賣以給食、擔束薪、行且誦書。其妻亦負戴相隨。數止買臣毋歌謳道中。買臣愈益疾歌。妻羞之。求去。買臣笑曰：「我年五十當富貴。今已四十餘矣。女苦日久。待我富貴報女。」妻恚怒曰：「如公等終餓死溝中。何能富貴？」買臣不能留。即聽去。其後買臣獨行歌道中。負薪墓間。故妻與夫家俱上冢。見買臣饑寒。呼飯飲之。後數歲。買臣隨上計吏爲卒。將重車至長安。詣闕上書。書久不報。待詔公車糧用乏。上計吏卒更乞匄之。會邑子嚴助貴幸。薦買臣。召見說春秋言楚詞。帝甚說之。拜買臣爲中大夫。與嚴助俱侍中。久之。買臣坐事免。復召待詔。是時東越數反覆。買臣因言故夷越王

居保泉山，一人守險，千人不得上。今聞東越王更徙處南行，去泉山五百里，居大澤中。今發兵浮海，直指泉山，陳舟列兵，席卷南行，可破滅也。上拜買臣會稽太守。上謂買臣曰：富貴不歸故鄉，如衣繡夜行。今子何如？買臣頓首辭謝。詔買臣到郡，治樓船，備糧食，水戰具，須詔書到，軍與俱進。初，買臣免待詔，常從會稽守邸者寄居飯食，及拜爲太守，買臣衣故衣，懷其印綬，步歸郡邸。直上計時，會稽吏方相與羣飲，不視買臣。買臣入室中，守邸與其食，食且飽，少見其綬，守邸怪之，前引其綬視其印，會稽太守章也。守邸驚出，語上計掾吏皆醉大呼曰：妄誕耳！守邸曰：試來視之。其

故人素輕買臣者，入視之，還走疾呼曰：「實然！」坐中驚駭。白守丞相，推排陳列中庭，拜謁。買臣徐出戶，有頃，長安廐吏乘駟馬車來迎。買臣遂乘傳去。會嵇聞太守且至，發民除道。縣吏並送迎，車百餘乘，入吳界。見其故妻，妻夫治道。買臣駐車呼令，後車載其夫妻到太守舍，置園中，給食之。居一月，妻自經死。買臣乞其天錢，令葬。悉召見故人，與飲食。諸常有恩者，皆報復焉。居歲餘，買臣受詔將兵，與橫海將軍韓說等俱擊破東越有功，徵入爲主爵都尉，列於九卿。數年坐法免官，復爲丞相長史。張湯爲御史大夫，始買臣與嚴助俱侍中，貴用事。湯尚爲小吏，趨走買臣等前。後湯

以廷尉治淮南獄、排陷嚴助、買臣怨湯、及買臣爲長史、湯數行丞相事、知買臣素貴、故陵折之、買臣見湯坐牀上、弗爲禮、買臣深怨、常欲死之、後遂告湯陰事、湯有罪自殺、上亦誅買臣子、山拊官至郡守、右扶風。

吾丘壽王

吾丘壽王字子贛、趙人也、年少以善格、五召待詔、詔使從中大夫董仲舒受春秋、後東都盜賊起、拜爲東都都尉、上以壽王爲都尉、不復置太守、是時軍旅數發、年歲不孰、多盜賊、詔賜壽王璽書曰、子在朕前時、知略輻湊、以爲天下少、雙海內寡二、及至連十餘城之守、任四千石之重、職事

並廢盜賊縱橫甚不稱在前時何也壽王謝罪因言其狀

胡說

徵入爲光祿大夫侍中丞相公孫弘奏言民不得挾弓弩
十賊曠弩百吏不敢前盜賊不輒伏辜免脫者衆害寡而
利多此盜賊所以蕃也禁民不得挾弓弩便上下其議壽
王對曰臣聞古者作五兵非以相害以禁暴討邪也安居
則以制猛獸而備非常有事則以設守衛而施行陣及至
周室衰微上無明王諸侯力政彊侵弱衆暴寡海內抗敝
巧詐並生是以知者陷愚勇者威怯苟以得勝爲務不顧
義理故機變械飭所以相賊害之具不可勝數今陛下昭
明德建太平舉俊材興學官三公有司或由窮巷起白屋

裂地而封、宇內日化、方外鄉風、然而盜賊猶有者、郡國二千石之罪、非挾弓弩之過也。禮曰：男子生，桑弧蓬矢以舉之，明示有事也。孔子曰：吾何執執射乎？大射之禮，自天子降及庶人，三代之道也。詩云：大侯既抗，弓矢斯張。射夫既同，獻爾發功，言貴中也。愚聞聖王合射以明教矣。未聞弓矢之爲禁也。且所爲禁者，爲盜賊之以攻奪也。攻奪之罪，死然而不止者，大姦之於重誅，固不避也。臣恐邪人挾之而吏不能止，良民以自備而抵法禁，是擅賊威而奪民救也。竊以爲無益於禁姦而廢先王之典，使學者不得習行其禮，大不便。書奏，上以難丞相弘、弘誦服焉。及汾陰得寶

鼎武帝嘉之薦見宗廟藏於甘泉宮羣臣皆上壽賀曰陛下得周鼎壽王獨曰非周鼎上聞召而問之曰朕得周鼎羣臣皆以爲然壽王獨以爲非何也有說則可無說則死壽王對曰臣安敢無說臣聞周德始乎后稷長於公劉大於太王成於文武顯於周公德澤上昭天下漏泉無所不通上天報應鼎爲周出故名曰周鼎今漢自高祖繼周亦昭德顯行布恩施惠六合和同至於陛下恢廓祖業功德愈盛天瑞並至珍祥畢見昔秦始皇親出鼎於彭城而不能得天祚有德而寶鼎自出此天之所以與漢乃漢鼎非周鼎也上曰善羣臣皆稱萬歲是日賜壽王黃金十斤後

坐事誅

主父偃

主父偃齊國臨菑人也學長短縱橫術晚乃學易春秋百家之言遊齊諸子間諸儒生相與排擯不容於齊家貧假貸無所得北游燕趙中山皆莫能厚客甚困以諸侯莫足游者元光元年乃西入關見衛將軍衛將軍數言上上不省資用之留久諸侯賓客多厭之乃上書闕下朝奏暮召入見所言九事其八事爲律令一事諫伐匈奴是時徐樂嚴安亦俱上書言世務書奏上召見三人謂曰公皆安在何相見之晚也乃拜偃樂安皆爲郎中偃數上䟽言事遷

謁者、中郎、中大夫、歲中四遷。偃說上曰：古者諸侯地不過百里，強弱之形易制。今諸侯或連城數十，地方千里，緩則驕奢，易爲淫亂；急則阻其強，而合從以逆京師。今以法割削，則逆節萌起；前日鼂錯是也。今諸侯子弟或十數，而適嗣代立，餘雖骨肉，無尺地之封，則仁孝之道不宣。願陛下令諸侯得推恩分子弟，以地侯之，彼人人喜得所願，上以德施，實分其國，必稍自銷弱矣。於是上從其計。又說上曰：茂陵初立，天下豪傑兼并之家，亂衆之民，皆可徙茂陵，內實京師，外銷姦猾。此所謂不誅而害除。上又從之。及尊立衛皇后，發燕王定國陰事，偃有功焉。大臣皆畏其口，賂遺

累千金。或說偃曰：大橫矣。偃曰：臣結髮游學四十餘年，身不得遂，親不以爲子，昆弟不收，賓客棄我，我危日久矣。且丈夫生不五鼎食，死則五鼎烹耳。吾日暮途遠，吾故倒行而暴施之。偃盛言朔方地肥饒，外阻河，蒙恬築城以逐匈奴。內省轉輸戍漕，廣中國，滅胡之本也。上覽其說，下公卿議，皆言不便。公孫弘曰：秦時嘗發二十萬衆築北河，終不可就。已而棄之，後朱買臣難訕。弘遂置朔方。本偃計也。元朔中，偃言齊王內有淫失之行，上拜偃爲齊相，至齊，徧召昆弟賓客，散五百金予之。數曰：始吾貧時，昆弟不我衣食，賓客不吾內門。今吾相齊，諸君迎我或千里，吾與諸君絕。

矣。毋復入偃之門。乃使人以王與姊姦事動王。王以爲終不得脫。恐效燕王論死。乃自殺。偃始爲布衣時。嘗游燕趙。及其貴。發燕事。趙王恐其爲國患。欲上書言其陰事。爲居中不敢發。及其爲齊相。出關。卽使人上書告偃。受諸侯金。以故諸侯子多以得封者。及齊至以自殺。聞上大怒。以爲偃劫其王令自殺。乃徵下吏治。偃服受諸侯之金。實不劫齊王。令自殺。上欲勿誅。公孫弘爭曰。齊王自殺。無後。國除。偃本首惡。非誅偃。無以謝天下。乃遂族偃。偃方貴幸時。客以千數。及族死。無一人收者。唯獨浚孔車收塋之。天子後聞之。以爲孔車長者也。

李生曰、此漢武英雄語、然主父知絕貧時賓客、而不知貴時客亦猶是也。

徐樂嚴安

徐樂、燕郡無終人也。上書以爲天下之患在於土崩、不在瓦解。何謂土崩？秦之末世是也。陳涉無千乘之尊、尺土之地、身非王公大人、名族之後、鄉曲之譽、非有孔墨之賢、陶朱、猗頓之富也。然起窮巷、奮棘矜、偏袒大呼、天下從風、此其故何也？由民困而主不恤、下怨而上不知、俗已亂而政不修。此三者、陳涉之所以爲資也。此之謂土崩。何謂瓦解？吳、楚、齊、趙之兵是也。七國謀爲大逆、號皆稱萬乘之君、帶

甲數十萬、威足以嚴其境內、財足以勸其士民、然不能西攘尺寸之地、而身爲禽於中原者、此其故何也、非權輕於匹夫、而兵弱於陳涉也、當是之時、先帝之德未衰、而安土樂俗之民衆、故諸侯無境外之助、此之謂瓦解、由此觀之、天下誠有土崩之勢、雖布衣窮處之士、或首難而危海內、陳涉是也、况三晉之君、或存乎天下、雖未治也、誠能無土崩之勢、雖有彊國勁兵、不得還踵而身爲禽、吳楚是也、况羣臣百姓能爲亂乎、此二體者、安危之明要、賢王之所留意而深察也、聞者關東五穀數不登、年歲未復、民多窮困、重之以邊境之事、推數循理、而觀之、宜有不安其處者矣、

不安故易動。易動者土崩之執也。故賢主獨觀萬化之原。明於安危之機。修之廟堂之上。而銷未形之患也。其要期使天下無土崩之執而已矣。故雖有彊國勁兵。陛下逐走獸。射飛鳥。弘游燕之囿。淫從恣之觀。極馳騁之樂。自若也。金石絲竹之聲。不絕於耳。帷幄之私。俳優朱儒之笑。不乏於前。而天下無宿憂。名何必夏子。俗何必成康。

嚴安者。臨菑人。以故丞相史。上書曰。臣聞鄒子曰。政教文質者。所以云救也。當時則用。過則舍之。有易則易之。故守一而不變者。未睹治之至也。其辭亦美。

終軍

終軍字子雲，濟南人也。少好學，以辯博能屬文聞於郡中。年十八，選爲博士弟子。至府受遣，太守聞其有異才，召見甚奇之，與交結。軍揖太守而去。至長安，上書言事。武帝異其文，拜爲謁者。給事中，從上幸雍，祠五畤，獲白麟一角而五蹄。時又得奇木，其枝旁出，輒復合於木上，上異此二物。博謀羣臣，軍上對曰：「臣聞詩頌君德，樂舞后功。昔武王中流未濟，白魚入於王舟，俯取以燎。羣公咸曰：『休哉！』今郊祀未見於神祇，而獲獸以饋，此天之所以示饗，而上通之符合也。宜因昭時，今日改定，告元苴白茅於江淮，發嘉號于營丘，使著事者有紀焉。蓋六鷁退飛，逆也；白魚登舟，順也。」

今野獸并角、明同本也。衆支內附、示無外也。若此之應、殆將有解、編髮削左衽、襲冠帶、要衣裳而蒙化者、斯拱而俟之耳。對奏上甚異之。由是改元爲元狩。後數月、越地及匈奴名王果率衆來降。元鼎中、博士徐偃使行風俗。偃矯制、使膠東魯國鼓鑄鹽鐵。御史大夫張湯劾偃矯制大害、法至死。偃以爲春秋之義、大夫出疆有可以安社稷存萬民、專之可也。湯以致其法不能誦其義、有詔下軍問狀。軍詰偃曰：「古者諸侯國異俗、分百里不通。時有聘會之事、安危之執、呼吸成變。故有不受辭、造命顓臾之宜者。」今天下爲一、萬里同風。春秋王者無外。偃巡封域之中、稱以出疆、何

也。鹽鐵郡有餘藏，正二國廢不鼓，不足以爲利害，而以安社稷，存萬民，爲辭何也？又膠東南近琅邪，北接北海，魯國西枕秦山，東有東海，受其鹽鐵，偃度四郡口數田地，率其用器食鹽，不足以并給二郡邪？將執宜有餘而吏不能也？且偃矯制而鼓鑄者，欲及春耕種，以瞻民器也。今魯國之鼓當先具其備，至秋乃能舉火，此言與實反者，非與偃已前三奏不許矣，而直矯作威福以從民望，干名采譽，此明聖所必誅也。所犯者重，所就者小，偃自予必死而爲之邪？將幸誅不加，欲以采名也？偃窮誅乃服罪，當死，初軍從濟南，當詣博士，步入關，關吏予軍繻，軍問以此何爲，吏曰爲

復傳還當以合符。軍曰：大丈夫西游，終不復傳還棄繻而去。後軍爲謁者，使行郡國，建節東出關。關吏識之，曰：此使者乃前棄繻生也。還奏事，上甚說。當發，使使匈奴，軍自請曰：軍無橫草之功，得列宿衛，食祿五年，邊境時有風塵之警，臣宜被堅執銳，當矢石，啓前行，驚下不習金革之事。今聞將遣匈奴使者，臣願盡精厲氣，奉佐明使，畫吉凶於單于之前，詔問畫吉凶之狀。上奇軍對，擢爲諫大夫。南越與漢和親，遣軍使南越，說其王欲令入朝。比內諸侯，軍自請願受長纓，必羈南越王而致之闕下。軍遂往說越王。越王聽許，請舉國內屬。天子大說，賜南越大臣印綬，壹用漢法。

以新改其俗令使者留填撫之軍死時年二十餘故世謂之終童。

藏書儒臣傳卷三十七

詞學儒臣

司馬相如

司馬相如字長卿成都人也少時好讀書擊劍名犬子及長文翁遺受七經學于長安相如既學慕蘭相如之爲人更名相如事孝景帝爲武騎常侍非其好也景帝又不好辭賦是時梁孝王來朝從文學之士鄒陽枚乘及嚴忌夫子之徒相如見而說之因病免客游梁得與諸侯文士居數歲乃著子虛之賦會梁孝王薨相如歸而家貧無以自業素與臨邛令王吉相善於是相如往舍都亭臨邛令日

往朝相如。相如初尚見之。後稱病使從者謝吉。吉愈益謹肅。臨邛富人卓王孫程鄭輩相謂曰。令有重客。爲具召之。并召令。令既至。至日中。長卿謝病不至。臨邛令不敢嘗食。身自迎相如。相如爲不得已。強而至。一坐盡傾。酒酣。臨邛令前奏琴曰。竊聞長卿好之。願以自娛。相如辭謝。爲鼓一再行。是時卓王孫有女文君新寡。好音。故相如繆與令相重。而以琴心挑之。相如時從車騎。雍容閒雅甚都。及飲卓氏弄琴。文君竊從戶窺心。說而好之。恐不得當也。旣罷。相如乃使人重賜文君侍者。通殷勤。文君夜亡奔相如。相如與馳歸成都。家徒四壁立。卓王孫大怒曰。女不材。我不忍。

殺一錢不分也。人或謂王孫、王孫終不聽。文君久之不樂。
謂長卿曰：「第俱如臨邛，從昆弟假貸，猶足爲生。」何至自苦
如此。相如遂與俱之臨邛，盡賣車騎，買酒舍，而令文君當
鑪。相如身自著犢鼻褌，與庸保雜作，滌器市中。卓王孫耻
之，爲杜門不出。昆弟諸公更謂王孫曰：「有一男兩女，所不
足者，非財也。今文君旣失身於司馬長卿，長卿故倦游，雖
貧，其人材足依也。且又令客卓王孫，不得已，分與文君僮
百人，錢百萬，及其嫁時衣被財物。」文君乃與相如歸成都，
買田宅爲富。人居久之，蜀人楊得意爲狗監，侍上，上讀子
虛賦而善之，曰：「朕獨不得與此人同時哉。」得意曰：「臣邑人

○正○獲身非失身

知有卓王孫者此女也當大喜何恥爲

○天、下、至、今、

此相如如真文章

司馬相如自言爲此賦上驚乃召問相如相如曰有是然此乃諸侯之事未足觀請爲天子游獵賦上令尚書給筆札相如以子虛虛言也爲楚稱烏有先生者烏有此事也爲齊難亡是公者亡是人也欲明天子之義故空藉此三人爲辭以推天子諸侯之苑囿其卒章歸之於節儉因以諷諫奏之天子天子大說以爲郎相如爲郎數歲會邛笮之君長聞南夷與漢通得賞賜多多欲願爲內臣妾請吏比南夷天子乃拜相如爲中郎將建節往使副使王然于壺充國呂越人馳四乘之傳因巴蜀吏幣物以賂西南夷至蜀太守以下郊迎縣令負弩矢先驅蜀人以爲寵於是

宋丁

○真○文○章○

卓王孫臨邛諸公皆因門下獻牛酒以交歡卓王孫喟然而歎自以得使女尚司馬長卿晚方知女有眼睛也而厚分與其女財與男等相如使略定西歸相笄冉駢斯榆之君皆請爲臣妾除邊關關益斥還報天子天子大說後從上至長楊獵是時天子方好自擊熊羆相如上䟽諫上善之還過宜春宮奏賦以哀二世行失因拜爲孝文園令天子旣美子虛之事相如見上好仙道因曰上林之事未足美也尚有靡者臣嘗爲大人賦未就請具而奏之相如以爲列仙之儒居山澤間形容甚臞此非帝王之仙意也乃遂奏大人賦天子大說飄飄有凌雲氣游天地之間意

久之相如病免家居茂陵天子曰司馬相如病甚可往從
悉取其書若後亡矣使所忠往而相如已死家無書其遺
札書言封禪事所忠奏其書天子異之相如既卒五歲天
子始祭后土八年而遂禮中嶽封泰山至梁父禪肅然相
如口吃而善著書好色常有消渴疾

李生曰論者以相如詞賦爲千古之絕若非遭逢漢武亦
且徒然故曰誰爲爲之孰令聽之聽者希則爲者雖工而
其志不樂况有天子知而好之此相如之遭所以爲大奇
也嗣是而降賦莫盛於楊雄文莫尚於韓愈然雄已不見
知于漢而愈亦不復見知于唐且其時取人以詩賦天子

好音、君臣道合、賡歌迭唱、可謂至盛極文、郁乎有斐之時也。今觀愈之文、亦無難讀者、獨奈何寥寥至百餘年、必待穆伯長而後知其好也。假使讀子虛上林、又當何如也。故吾謂漢武帝真不世出之雄者、非過也。雖然、又有奇者、方相如之客臨邛也、臨邛富人如程鄭、卓王孫等、皆財傾東南之產、而目不識一丁、令雖奏琴、空自鼓也。誰知琴心、其陪列實席者、衣冠濟楚、亦何偉也。空自見金而不見人、但見相如之貧、不見相如之富也。不有卓氏、誰能聽之。然則相如、卓氏之梁鴻也。使當其時、卓氏如孟光、必請於王孫、吾知王孫必不聽也。嗟夫、斗筭小人、何足計事、徒失佳偶。

空負良緣，不如早自決擇，恐小耻而就大計，易不云乎？同聲相應，同氣相求，同明相照，同類相招，雲從龍，風從虎，歸鳳求凰，安可誣也。是又一奇也。悲夫！古今材士，數奇寡諧，奈之何？彼相如者，獨抱二奇，以遊於世，予是以感慨而私論之，未敢以語人也。

伍被

伍被，楚人也，以才學爲淮南中郎。是時淮南王安好術學，養士數千人，高材者有八，曰蘇非、李尚、左吳、田由、雷被、伍被、毛被、晉昌。號曰八公。而被爲冠首。淮南怨望厲王，死時，時蓄有邪謀，後坐東宮，召被欲計事，呼被曰：「將軍上，彼曰：「

王安得亡國之言乎。昔子胥諫吳王，吳王不用，乃曰：臣今見麋鹿游姑蘇之臺也。今臣亦將見宮中生荆棘，露霑衣也。於是王怒，繫被父母囚之。三月，復召被曰：將軍許寡人乎？被曰：小臣將爲大王畫計耳。臣聞聰者聽於無聲，明者見於未形。故聖人萬舉萬全。文王一動而功顯，萬世列爲三王。所謂因天心以動作者也。王曰：方今漢廷治乎？亂乎？被曰：天下治。王不說，曰：公何以言治也？被因稱說漢治。王怒，被謝死罪。王又曰：山東卽有變，漢必使大將軍將而制山東。公以爲大將軍何如？人被曰：臣所善黃義從大將軍擊匈奴，言大將軍遇士大夫以禮，與士卒有恩，衆皆樂爲。

用騎上下山如飛材力絕人如此數將習兵未易當也及
謁者曹梁使長安來言大將軍號令明當敵勇常爲士卒
先須士卒休乃舍穿井得水乃敢飲軍罷士卒已踰河乃
渡皇太后所賜金錢盡以賞賜雖古名將不過也王復問
被曰公以爲吳舉兵非邪被曰非也夫吳王賜號爲劉氏
祭酒受几杖而不朝王四郡之衆地方數千里采山銅以
爲錢煮海水以爲鹽伐江陵之木以爲船國富民衆行珍
寶賂諸侯與七國合從舉兵而西卒破大梁敗狐父奔走
而還爲越所禽歿於丹徒頭足異處身滅祀絕爲天下戮
夫以吳衆不能成功者何也誠逆天違衆而不見時也王

日。男。子。之。所。死。者。一。言。耳。且。吳。何。知。反。漢。將。一。日。過。成。皐。者。四。十。餘。人。今。我。今。緩。先。要。成。皐。之。口。周。被。下。潁。川。兵。塞。轅。轅。伊。闕。之。道。陳。定。發。南。陽。兵。守。武。關。河。南。太。守。獨。有。雒。陽。耳。何。足。憂。被。曰。臣。見。其。禍。未。見。其。福。也。王。曰。左。吳。趙。賢。朱。驕。如。皆。以。爲。十。八。九。成。公。獨。以。爲。無。福。何。被。曰。大。王。之。羣。臣。近。幸。素。能。使。衆。者。皆。前。繫。詔。獄。餘。無。可。用。者。王。曰。陳。勝。吳。廣。無。立。錐。之。地。百。人。之。聚。起。于。大。衆。奮。臂。大。呼。天。下。嚮。應。西。至。於。戲。而。兵。百。二。十。萬。今。吾。國。雖。小。勝。兵。可。得。二。十。萬。公。何。以。言。有。禍。無。福。被。曰。臣。不。敢。避。子。胥。之。誅。願。大。王。無。爲。吳。王。之。聽。往。者。秦。爲。無。道。殘。賊。天。下。殺。術。士。燔。詩。

書滅聖跡、棄禮義、任刑法、轉海瀕之粟、致于西河、當是之時、男子疾耕、不足于糧、餽女子紡績、不足於蓋形、遣蒙恬、築長城、東西數千里、暴兵露師、常數十萬、死者不可勝數、僵尸滿野、流血千里、於是百姓力屈、欲爲亂者、十室而五、又使徐福入海求仙藥、多齎珍寶、童男女三千人、五種百工而行、徐福得平原大澤、止王不來、於是百姓悲痛愁思、欲爲亂者、十室而六、又使尉佗踰五嶺、攻百越、尉佗知中國勞極、止王南越、使人上書求女、無夫家者三萬人、以爲士卒衣補、秦皇可其萬五千人、於是百姓離心、瓦解、欲爲亂者、十室而七、客謂高皇帝曰、時可矣、高皇帝曰、待之聖

人當起東南間不一歲陳吳大呼劉項並和天下嚮應所謂蹈瑕釁因秦之亡而動者也百姓願之若枯旱之望雨故起於行陣之中以成帝王今大王見高祖得天下之易也獨不觀近世之吳楚乎當今陛下臨制天下一齊海內汜愛蒸庶布德施惠口雖未言聲疾雷震令雖未出化馳如神心有所懷威動千里下之應上猶景嚮也而大將軍材能非直章邯楊熊也王以陳勝吳廣論之被以爲過矣且大王之兵衆不能什分吳楚之一天下安寧又萬倍於秦時願王用臣之計臣聞箕子過故國而悲作麥秀之歌痛紂之不用王子比干之言也故孟子曰紂貴爲天子死

曾不如匹夫是紂先自絕久矣非死之日天去之也今臣亦竊悲大王棄千乘之君將賜絕命之書爲羣臣先身死于東宮也被囚流涕而起後事發覺被詣吏自告天子以伍被雅辭多引漢美欲勿誅張湯進曰被首爲王畫反計罪無赦遂誅被

王褒

王褒字子淵蜀人也宣帝時修武帝故事講論六藝羣書博盡奇異之好徵能爲楚辭九江被公召見誦讀益召高材劉向張子僑華龍柳褒等待詔金馬門祔爵五鳳之間天下殷富數有嘉應上頗作歌詩欲興協律之事丞相魏

相奏言、知音善鼓雅琴者、勃海趙定、梁國龔德、皆召見待
詔、於是益州刺史王褒欲宣風化於衆庶、聞王褒有俊材、
使褒作中和樂職宣布詩、選好事者、令依鹿鳴之聲習而
歌之、時汜鄉侯何武爲僮子、選在歌中、久之武等學長安
歌太學下、轉而上聞、宣帝召見武等觀之、皆賜帛、謂曰、此
盛德之事、吾何足以當之、褒旣爲刺史作頌、又作其傳、益
州刺史因奏褒有軼材、上乃徵褒、旣至、詔褒爲聖主得賢
臣頌、褒對曰、夫荷旃被毳者、難與道純、繇之麗密、龔藜
糗者、不足與論太牢之滋味、今臣辟在西蜀、生於窮巷之
中、長於蓬茨之下、無有遊觀廣覽之知、不知以塞厚望、應

明指雖然敢不略陳愚而抒情素夫賢者國家之器用也
所任賢則趨舍省而功施普器用利則用力少而就效衆
故工人之用鈍器也勞筋苦骨終日矻矻及至巧冶鑄干
將之樸清水淬其鋒越砥斂其矐水斷蛟龍陸剽犀革忽
若雪汜畫塗如此則使離婁督繩公輸削墨雖崇臺五層
延袤百丈而不溷者工用相得也庸人之御駑馬亦傷吻
敝策而不進於行何喘膚汗人極馬倦及至駕齧郛駢乘
旦王良執靶韓哀附輿縱馳騁驚忽如景靡過都越國蹶
如歷塊追奔電逐遺風周流入極萬里一息何其遼哉人
馬相得也故服絺綌之涼者不苦盛暑之鬱燠襲貂狐之

煥者不憂至寒之悽愴何則有其具者易其備賢人君子亦聖王之所以易海內也是以嘔喩受之開寬裕之路以延天下英俊也由此觀之君人者勤於求賢而逸於得人。人臣亦然。昔賢者之未遭遇也圖事揆策則君不用其謀。陳見惓誠則上不然其信進仕不得施效斥逐又非其愆。是故伊尹勤於鼎俎太公困於鼓刀百里白鬻審子飯牛。離此患也。及其遇明君遭聖主也運籌合上意諫諍卽見聽進退得關其忠任職得行其術去卑辱與渫而升本朝。離䟽釋躋而享膏粱剖符錫壤而光祖考傳之子孫以資說士。故世必有聖知之君而後有賢明之臣。故虎嘯而冽。

風龍興而致雲、蟋蟀、秋吟、蜉蝣出以陰、易曰、飛龍在天、利見大人、詩曰、思皇多士、生此王國、故世平主聖、俊乂將自至、若堯舜禹湯文武之君、獲稷、契、皋陶、伊尹、呂望、明明在朝、穆穆列布、聚精會神、相得益章、雖伯牙操、遮鍾逢門子、鸞鳥號、猶未足、譬喻其意也、故聖主必待賢臣而弘功業、俊士亦俟明主以顯其德、上下俱欲、歡然交欣、千載一合、論說無疑、翼乎如鴻毛、遇順風、沛乎如巨魚、縱大壑、其得意若此、則胡禁不止、曷令不行、化溢四表、橫被無窮、遐夷貢獻、萬祥畢臻、是以聖主不徧窺望、而視已明、不單傾耳、而聽已聰、恩從祥風、翔德與和氣游、休徵自至、壽考無

彊雍容垂拱永永萬年何必偃仰拙信若彭祖呶噓呼吸如喬松眇然絕俗離世哉是時上頗好神仙故褒對及之上令褒與張子僑等並待詔數從褒等放獵所幸宮館輒爲歌頌第其高下以差賜帛議者多以爲淫靡不急上曰不有博奕者乎爲之猶賢乎已辭賦大者與古詩同義小者辯麗可喜譬如女工有綺縠音樂有鄭衛今世俗猶皆以此虞說耳目辭賦比之尚有仁義風諭鳥獸草木多聞之觀賢於倡優博奕遠矣頃之擢褒爲諫大夫其後太子體不安苦忽忽善忘不樂詔使褒等皆之太子宫虞侍太子朝夕誦讀奇文及所自造作疾平乃歸太子喜褒所爲

甘泉及洞簫頌、今後宮貴人左右皆誦讀之。後方士言益州有金馬碧鷄之寶、可祭祀致也。宣帝使褒往祀焉。褒於道病死、上閔惜之。

劉向

劉向字子政、本名更生、年十二、以父德任爲輦郎。旣冠、行修飭、擢諫大夫。是時宣帝循武帝故事、招選名儒俊材置左右、更生以通達能屬文、與王褒、張子僑等並進對獻賦、頌、上復興神仙方術之事。而淮南有枕中鴻寶苑秘書、書言神仙使鬼物爲金之術、及鄒衍重道延命方、世人莫見、而更生父德武帝時治淮南獄、得其書、更生幼而讀誦以

爲奇獻之言黃金可成上令典尚方鑄作事費甚多方不

驗上乃下更生吏吏劾更生鑄僞黃金繫當死更生兄陽

城侯安民上書入國戶半贖更生罪上亦奇其材得踰冬

減死論會初立穀梁春秋徵更生受穀梁講論五經於石

渠元帝初卽位太傅蕭望之爲前將軍少傅周堪爲諸吏

光祿大夫皆領尚書事甚見尊任更生年少於望之堪然

二人重之薦更生宗室忠直明經有行擢爲散騎宗正給

事中與侍中金敞並拾遺於左右四人同心輔政患苦外

戚許史在位放縱而中書宦官弘恭石顯弄權望之堪更

生議欲白罷退之未白而語泄遂爲許史及恭顯所譖愬

胡說

胡做

堪更生下獄及望之皆免官其春地震夏客星見昴卷舌

間上感悟下詔賜望之爵關內侯奉朝請秋徵堪向欲以

爲諫大夫恭顯好皇帝白皆爲中郎冬地復震時恭顯許史子弟

侍中諸曹皆側目於望之等更生懼乃使其外親上變事

書奏恭顯疑其更生所爲白請考姦詐辨果服遂逮更生

繫獄更生坐免爲庶人而望之亦坐使子上書自殺天子

甚悼恨之乃擢周堪爲光祿勳堪弟子張猛光祿大夫給

事中大見信任恭顯憚之數譖毀焉更生懼其傾危乃上

封事其略曰執狐疑之心者來讒賊之口持不斷之意者

開羣枉之門故治亂榮辱之端在所信任信任旣賢在於

堅固而不移。詩云：我心匪石，不可轉也。言守善篤也。易曰：渙汗其大號，言號令如汗，汗出而不反者也。今出善令，未能踰時而反，是反汗也。用賢未能三旬而退，是轉石也。論語曰：見不善如探湯。今二府奏佞，調不當在位，歷年而不去，故出令則如反汗，用賢則如轉石，去佞則如坂山，如此望陰陽之調，不亦難乎？是以羣小窺見間隙，緣飭文字，巧言醜詆，流言飛文，譁於民間。詩云：憂心悄悄，愠于羣小。小人成羣，誠足愠也。恭顯見其書，愈與許史而怨更生等。是歲夏寒，日青無光，恭顯及許史皆言堪猛用事之咎。上內重堪，又患衆口之寤，乃左遷堪爲河東太守，猛槐里令。

後三歲餘孝宣廟闕災其晦日有蝕之於是上召諸前言
日變在堪猛者責問皆稽首謝因下詔徵堪詣行在所拜
爲光祿大夫秩中二千石領尚書事猛復爲太中大夫給
事中顯幹尚書尚書五人皆其黨堪希得見亦會堪疾瘖
不能言而卒顯遂誣譖猛令自殺於公車更生傷之乃著
疾讒摘要救危及世頌凡八篇依興古事悼已及同類也
遂廢十餘年成帝卽位顯等伏辜更生乃復進用更名向
向以故九卿召拜爲中郎使領護三輔都水數奏封事遷
光祿大夫是時帝元舅陽平侯王鳳爲大將軍秉政倚太
后專國權兄弟七人皆封爲列侯時數有大異向以爲外

戚貴盛鳳兄弟用事之咎而上方精於詩書觀古文詔向
領校中五經祕書向見尚書洪範箕子爲武王陳五行陰
陽休咎之應乃集合上古以來歷春秋六國至秦漢符瑞
災異之記推迹行事連傳禍福著其占驗比類相從各有
條目凡十一篇號曰洪範五行傳論奏之天子心知向精
忠故爲鳳兄弟起此論也然終不能奪王氏權久之營起
昌陵數年不成復還歸延陵制度泰奢向上䟽諫曰古之
葬者厚衣之以薪藏之中野不封不樹後世聖人易之以
棺槨棺槨之作自黃帝始黃帝葬於橋山堯葬濟陰丘隴
皆小葬具甚微舜葬蒼梧二妃不從禹葬會稽不改其列

殷湯無葬處、文武周公葬於畢、夫周公、武王弟也、葬兄甚微、孔子葬母於防、稱古墓而不墳、曰丘東西南北之人也、不可不識也、爲四尺墳、遇雨而崩、弟子修之、以告孔子、孔子流涕曰、吾聞之古者不修墓、蓋非之也、延陵季子適齊而反、其子歿、葬於贏博之間、穿不及泉、斂以時服、封墳掩坎、其高可隱、夫贏博去吳千有餘里、季子不歸葬、孔子往觀、曰、延陵季子於禮合矣、故仲尼孝子而延陵慈父、舜禹忠臣、周公弟弟、其葬君親骨肉皆微薄、非苟爲儉誠、便於體也、秦始皇葬於驪山之阿、下錮三泉、上崇山墳、其高五十餘丈、周圍五里有餘、石槨爲游館、人膏爲燈燭、水銀爲

江海黃金爲鳬鴈珍寶之藏機械之變棺槨之麗宮館之盛不可勝原又多殺宮人生葬工匠計以萬數天下苦其役而反之驪山之作未成而周章百萬之師至其下矣項籍燔其宮室營宇往者咸見發掘其後牧兒亡羊羊入其鑿牧者持火求羊失火燒其臧椹自古至今葬未有盛如始皇者也數年之間外被項籍之災內離牧豎之禍以歿者爲有知發人之墓其害多矣若其無知又安用大謀之賢知則不說以示衆庶則苦之若苟以說愚夫淫侈之人又何爲哉向又睹俗彌奢淫而趙衛之屬起微賤踰禮制故採取詩書所載賢妃貞婦興國顯家可法則者序次爲

列女傳凡八篇及采傳記行事著新序說苑五十篇奏之時時上䟽言得失陳法戒書數十上上雖不能盡用然內嘉其言常嗟歎之時上無繼嗣政由王氏出災異浸甚向雅奇陳湯智謀獨謂湯曰災異如此而外家日盛其漸必危劉氏今吾幸得同姓末屬纍世蒙漢厚恩身爲宗室遺老歷事三主上以我先帝舊臣每進見輒加優禮吾而不言孰當言者遂上封事極諫書奏天子召見向歎息悲傷謂曰君且休矣吾將思之以向爲中壘校尉向爲人簡易無威儀廉靖樂道不交接世俗專積思於經術晝誦書傳夜觀星宿或不寐達旦元延中星孛東井蜀郡岷山崩雍

江向惡此異懷不能已復上奏向自見得信於上故常顯
訟宗室譏刺王氏及在位大臣其言多痛切發於至誠上
數欲用向爲九卿輒爲王氏居位者及丞相御史所持居
列大夫官前後三十餘年年七十二卒卒後十三歲而王
氏篡漢李生曰予讀戰國策而知劉子政之陋也夫春秋
之後爲戰國旣爲戰國之時則自有戰國之策盖與世推
移其道必爾如此者非可以春秋之治治之也明矣况三
王之世與五霸者春秋之事也夫五霸何以獨盛於春秋
也蓋是時周室旣衰天子不能操禮樂征伐之權以號令
諸侯故諸侯有不令者方伯連帥率諸侯以討之相與尊

天子而協同盟、然後天下之勢復合于一、此如父母臥病、不能事事、羣小構爭、莫可禁阻、中有賢子、自爲家督、遂起而身父母之任焉、是以名爲兄弟、而其實則父母也、雖若侵父母之權、而實父母賴之以安、兄弟賴之以和、左右童僕諸人、賴之以立、則有勞于厥家大矣、管仲相桓、所謂首任其事者也、從此五霸迭興、更相雄長、夾輔王室、以藩屏周、百足之虫、遲遲復至、二百四十餘年者、皆管仲之功、五霸之力也、諸侯又不能爲五霸之事者、於是、有志在吞周、心圖混一、如齊宣之所欲爲者焉、晉氏爲三、呂氏爲四、諸侯亦莫之正也、則安得不遂爲戰國而致謀臣策士于千

里之外哉其勢不至混一故不止矣劉子政當西漢之末
造感王室之將燬徒知羨三王之盛而不知戰國之宜其
見固已左矣彼鮑矣者生于宋元之季聞見塞胸仁義盈
耳區區褒貶何足齒及乃曾子固自負不少者也咸謂其
文章本於六經矣乃譏向自信之不篤邪說之當正則亦
不知六經爲何物而但竊褒貶以繩世則其視鮑與吳亦
魯衛之人矣

崔駰等

崔駰字亭伯涿郡人也祖篆王莽時爲郡文學以明經徵
詣公車太保甄豐舉爲步兵校尉篆辭曰吾聞伐國不問

仁人戰陳不訪儒士此舉奚爲至哉遂投劾歸時篆兄發

得幸於莽位至大司空乃以篆爲建新大尹篆不得已歎

曰吾生無妄之世值澆羿之君○即○師○氏○所○謂○義○成○夫○人○者上有老母下有兄弟安得

獨潔已而危所生哉遂單車到官三年不行縣門下掾倪

敞諫篆乃強起班春所至之縣獄犴填滿篆垂涕曰嗟乎

刑罰不中乃陷人於窵此皆何罪而至遂理出二千餘人

掾吏扣頭固爭篆曰○○邾文公不以一人易其身君子謂之

知命如殺一大尹贖○○二千人蓋所願也遂稱疾去客居滎

陽閉門潛思著周易林六十四篇用決吉凶多占驗臨終

作賦以自悼名慰志焉篆生毅以疾隱身不仕毅生駟年

十三、能通詩易春秋博學有偉才、善屬文、少游太學、與班固、傅毅齊名、常以典籍爲業、時人譏其太玄靜、駟擬楊雄解嘲作達旨。元和中、肅宗始修古禮、巡狩方岳、駟上四巡頌、以稱漢德、辭甚典美、帝雅好文章、自見駟頌、後常嗟歎、謂其侍中竇憲曰、卿知崔駟乎、對曰、班固數爲臣說之、帝曰、公愛班固而忽崔駟、此葉公之好龍也、憲由此見駟、笑謂駟曰、亭伯、吾受詔交公、遂揖入爲上客、居無幾、帝幸憲第、時駟適在憲所、帝聞欲見之、憲以爲不宜、帝悟曰、吾能令駟朝夕在側、何必於此、會帝崩、竇太后臨朝、憲以重戚、辟駟爲掾、憲府貴重、掾屬三十人、皆故刺史二千石、唯駟

以處士年少擢在其間、憲擅權驕恣、駟數諫諍、憲不能容、因出駟爲長岑長遂不之官而歸、永元四年卒、所著詩賦銘頌書記表七依婚禮結言達旨酒警、合二十一篇、中子瑗、瑗字子玉、早孤、銳志好學、盡能傳其父業、年十八至京師、從侍中賈逵、質正大義、逵善待之、瑗因畱游學、遂明天官歷數、京房易傳、六日七分、諸儒宗之、與扶風馬融、南陽張衡特相友好、辟車騎將軍閭顯府、時閭太后稱制、顯入參政事、先是安帝廢太子爲濟陰王、而以北鄉侯爲嗣、瑗以侯立、不以正、謂長史陳禪曰、中常侍江京、陳達等、以嬖寵惑蠱先帝、使廢黜正統、扶立疎孽、少帝卽位、發病廟中、

周勃之徵於斯復見今欲與長史共見說將軍白太后收
京等而廢少帝引立濟陰王必上當天心下合人望而禪
未敢決會北鄉侯薨孫程等立濟陰王是爲順帝閹顯兄
弟伏誅瑗坐被斥門生蘇祗具知瑗謀欲上書言狀瑗聞
是○而止之時陳禪爲司隸校尉召瑗謂曰第聽祗上書禪請
爲之證瑗曰此譬猶兒妾屏語耳願使君勿復出口遂辭
歸不復應州郡命子寔字子真明於政體吏才有餘論當
世便事數十條名曰政論指切時要言辯而確仲長統曰
凡爲人主宜寫一通置之坐側其辭曰凡天下所不理者
嘗由人主承平日久俗漸敝而不悟政寢衰而不改習亂

安危快不自覩、或荒耽嗜欲、不恤萬機、或猶豫岐路、莫適
 所從、或見信之佐、括囊守祿、或踈遠之臣、言以賤廢、是以
 王綱縱弛於上、智士鬱伊於下、悲夫、自漢興以來、三百五
 十餘歲矣、政令垢翫、上下怠懈、風俗彫敝、人庶僞巧、以故
 百姓囂然、復思中興、且濟時拯世之術、豈必體堯蹈舜、然
 後乃理哉、期於補綻決壞、枝柱邪傾、隨形裁割、要措斯世
 於安寧之域而已、故聖人執權、遭時定制、步驟之差、各有
 云、設不彊人以不能、背急切而慕所聞也、蓋孔子對葉公
 以來、遠哀公以臨人、景公以節禮、非其不同、所急異務也、
 俗人拘文牽古、不達權制、竒偉所聞、簡忽所見、烏可與論

國家之大事哉。故言事者。雖合聖德。輒見倚奪。何者。其頑士闇於時權。安習所見。不知樂成。况可慮始。其達者。或矜名妒能。耻策非已。舞筆奮辭。以破其義。寡不勝衆。遂見擯棄。雖稷契復存。猶將困焉。故宜量力度德。參以霸政。重賞深罰。以御之。明著法術。以檢之。自非上德嚴之。則理寬之。則亂。何以明其然也。近孝宣皇帝。明於君人之道。審於爲政之理。故嚴刑峻法。破姦軌之膽。海內清肅。天下密如薦。勲祖廟。享號中宗。筭計見效。優於孝文。元帝卽位。多行寬政。卒以墮損。威權始奪。遂爲漢室基禍之主。政道得失。於斯可監。昔孔子作春秋。褒齊桓。懿晉文。歎管仲之功。夫豈

不美文武之道哉。誠達權救敝之理也。故聖人能與世推
移。而俗士苦不知變。以爲結繩之約。可復理亂秦之緒。干
戚之舞。足以解平城之圍。夫熊經鳥伸。雖延歷之術。非傷
寒之理。呼吸吐納。雖度紀之道。非續骨之膏。蓋爲國之法。
有似理身。平則致養。疾則攻焉。刑罰者。治亂之藥石也。德
教者。興平之梁肉也。以德教除殘。是以梁肉理疾也。以刑
罰理平。是以藥石供養也。方今承百王之敝。值亢運之會。
自數世以來。政多恩貸。馭委其轡。馬駘其銜。四牡橫奔。皇
路傾險。方將掛勒韃鞬。以救之。豈暇鳴和鑾。清節奏哉。昔
高祖令蕭何作九章之律。有夷三族之令。黥劓斬趾斷舌。

梟首故謂之具五刑文帝雖除肉刑當劓者笞三百當斬
左趾者笞五百當斬右趾者棄市右趾者旣殞其命笞撻
者往往至死雖有輕刑之名其實殺也當此之時民皆思
復肉刑至景帝元年乃下詔曰加笞與重罪無異幸而不
死不可爲民乃定律減笞輕撻自是之後笞者得全以此
言之文帝乃重刑非輕之也以嚴致平非以寬致平也召
拜議郎遷大將軍龔司馬與邊韶延篤等著作東觀出爲
五原太守是時胡虜連入雲中朔方殺略吏民一歲至九
奔命寔整厲士馬嚴烽候虜不敢犯建寧中病卒光祿勳
楊賜太僕袁逢少府段熲爲備棺槨葬具大鴻臚袁隗樹

碑頌德寔從兄烈有重名歷位郡守九卿靈帝時開鴻都門榜賣官爵是時段熲樊陵張溫等雖有功勤名譽然皆先輸貨財而後登公位烈時因傳母入錢五百萬得爲司徒及拜日天子臨軒百僚畢會帝顧謂倖者曰悔不小靳可至千萬烈於是聲譽衰減久之問其子鈞曰吾居三公外議何如鈞曰大人少有英稱歷位卿守論者不謂當爲三公今登其位天下失望烈曰何爲然也鈞曰○鈞○兒○論者嫌其銅臭烈怒舉杖擊之烈亦有文才

王充

王充字仲任會稽人受業太學師事扶風班彪好博覽而

不守章句、家貧無書、嘗游洛陽市肆、閱所賣書、一見輒能誦憶、遂博通衆流百家之言、充好論說、始右詭異、終有理實、以爲俗儒守文、多失其真、乃閉門潛思、絕慶弔之禮、戶牖牆壁各置刀筆、著論衡八十五篇、二十餘萬言、釋物類同異、正時俗嫌疑、刺史董勤辟爲從事、轉治中、自免還家、友人同郡謝夷吾上書薦克才學、肅宗特詔公車徵病不行、年漸七十、乃造養性書十六篇、裁節嗜欲、願神自守、永元中、病卒于家、袁山松曰、克所作論衡中土未有傳者、蔡邕入吳、始得之、恒祕玩、以爲談助、其後王朗爲會稽太守、又得其書、及還許下、時人稱其才進、或曰、不見異人、當得

異書問之果以論衡之益抱朴子曰時人疑蔡邕得異書或搜求其帳中隱處果得論衡抱數卷持去邕丁寧之曰唯我與尔共之勿廣也

王符

王符字節信安定人也少好學有志操與馬融張衡崔瑗等友善安定俗鄙庶孽而符無外家爲鄉人所賤自和安之後世務游宦當塗者更相薦引而符獨耿介不同於俗以此遂不得升進志意蘊憤乃隱居著書三十餘篇以譏當時失得不欲章其姓名故號曰潜夫論其指訐時短討謫物情以觀見當時其五篇論曰帝王之所尊敬

者天也。皇天之所愛育者人也。今人臣受君之重位，牧天之所愛焉，可以不安而利之養而濟之哉？是以君子任職則思利人，達上則思進賢，故居上而下不怨，在前而後不恨也。季世之臣以諂媚主，不思順天，專伐殺伐，白起蒙恬秦以爲功，天以爲賊。息夫董賢主以爲忠，天以爲盜。易曰：德薄而位尊，智小而謀大，鮮不及矣。是故德不稱，其禍必酷；能不稱，其殃必大。夫竊位之人，天奪其鑒，雖有明察之資、仁義之志，一旦富貴，則背親捐舊，喪其本心，踈骨肉而親便辟，薄知友而厚犬馬，寧見朽貫千萬而不忍貸人一錢，情知積粟腐倉而不忍貸人一斗，骨肉怨望於家，細人

謫譴於道前人以敗後爭襲之誠可傷也歷觀前政貴人
之用心也與嬰兒子何其異哉嬰兒有常病貴臣有常禍
父母有常失人君有常過嬰兒常病傷於飽也貴臣常禍
傷於寵也哺乳多則生癰病富貴盛則生驕疾愛子而賊
之驕臣而滅之者非一也極其罰者乃有什死深牢銜刀
都市豈非無功於天有害於人者乎夫烏以山爲埤而增
巢其上魚以泉爲淺而穿穴其中卒所以得者餌也貴戚
願其宅吉而制爲令名欲其門堅而造作鐵樞卒其所以
敗者非苦禁忌少而門樞朽也常苦崇財貨而行驕僭耳
不上順天心下育人物而欲任其私智竊弄君威反戾天

地欺誣神明、居累卵之危、而圖泰山之安、爲朝露之行、而思傳世之美、豈不惑哉！夫國以賢興、以諂衰、君以忠安、以佞危、然衰國危君、繼踵不絕者、豈時無忠信正直之士哉？誠苦其道不得行耳。夫十步之間、必有茂草、十室之邑、必有忠信。是故亂殷有三仁、小衛多君子。今以大漢之廣土、士民之繁庶、朝廷之清明、上下之修正、而官無善吏、位無良臣、此豈時之無賢、諒由取之乖實耳。夫志道者少、與逐俗者多、疇是以朋黨用私、背實趨華、其貢士者、不復依其質幹、準其才行、但虛造聲譽、妄生羽毛、略計所舉、歲且二百、覽察其狀、則德侔顏冉、詳覈厥能、則鮮及中人、夫士者

貴其用也。不必求備。故四友雖美。能不相兼。三仁齊致。事不一節。高祖佐命。出自亡秦。光武得士。亦資暴莽。况太平之時。而云無士乎。夫明君之詔也。若聲忠臣之和也。如響長短。大小清濁。疾徐必相應也。且攻玉以石。洗金以鹽。濯錦以魚。浣布以灰。夫物固有以賤理貴。以醜化好者矣。智者棄短取長。以致其功。今使貢士。必覈以實。其有小疵。勿彊衣飾。出處默語。各因其方。則蕭曹周韓之倫。何足不致。吳鄧梁竇之屬。企踵可待矣。孔子曰。聽訟吾猶人也。從此言之。中才以上。足議曲直。鄉亭部吏。亦有任決斷者。而類多枉曲。盖有故焉。夫理直則恃正而不撓。事曲則詔意以

行賕不撓故無恩於吏行賕故見私於法若事有反覆吏
應坐之吏以應坐之故不得不枉之於廷以羸氏之少黨
而與豪吏對訟其勢得無屈乎縣承吏言故與之同若事
有反覆縣亦應坐之縣以應坐之故而排之於郡以一民
之輕而與一縣爲訟其理豈得申乎事有反覆郡亦坐之
郡以共坐之故而排之於州以一民之輕與一郡爲訟其
事豈獲勝乎既不冝理故乃遠詣公府公府復不能察而
延以日月貧弱者無以曠旬彊富者可盈千日理訟若此
何枉之能理乎正士懷怨結而不見信猾吏崇姦宄而不
被坐此小民所以易侵苦而天下所以多困窮也凡療病

者必知脉之虛實、氣之所結、然後爲之方、故疾可愈而毒可長爲國者、必先知民之所苦、禍之所起、然後爲之禁、故姦可塞而國可安、今日賊良民之甚者、莫大於數赦贖、數則惡人昌而善人傷矣、何以明之哉、夫謹敕之人、身不蹈非、又有爲吏正直、不避彊禦、而奸猾之黨、橫加誣言者、皆知赦之不久故也、善人君子、被侵怨而能至闕廷自明者、萬無數人、數人之中、得省問者、百不過一、旣對尚書而空遣去者、復什六七矣、其輕薄姦宄、旣陷罪法、怨毒之家、冀其辜戮以解畜憤、而反一槩悉蒙赦釋、令惡人高會而誇咤、老盜服臧而過門、孝子見讎而不得討、遭盜者觀物而

不敢取痛莫甚焉夫養稂莠者傷禾稼惠姦宄者賊良民
書曰文王作罰刑茲無赦先王之制刑法也非以養姦活
罪放縱天賊也夫性惡之民雖得放宥之澤終無改悔之
心旦脫重梏夕還囹圄何也凡敢爲大姦者才必有過於
衆而能自媚於上者也多散誕得之財奉以諂諛之辭以
轉相驅非有第五公之廉直孰不爲顧哉後渡遼將軍皇
甫規解官歸安定鄉人有以貨得鴈門太守者亦去職還
家書刺詣規規臥不迎旣入而問曰卿前在郡食鴈美乎
有頃又白王符在門規素聞符名乃驚遽而起衣不及帶
屣履出迎援符手而還與同坐極歡時人爲之語曰徒見

二千石不如一縫掖言書生道之爲貴也符竟不仕終於家

仲長統

仲長統字公理山陽高平人年二十餘游學青徐并冀之間并州刺史高幹袁紹甥也素貴有名統過幹幹訪以當時之事統謂幹曰君有雄志而無雄才好士而不能擇人所以爲君深戒也幹雅自多不納其言統遂去之幹卒敗并冀之士皆以是異統統性倨儻敢直言不矜小節默語無常時人或謂之狂生每州郡命召輒稱疾不就嘗以爲凡遊帝王者欲以立身揚名耳而名不常存人生易滅優

游偃仰可以自娛、欲卜居清曠以樂其志、論之曰、使居有
良田、廣宅、背山臨流、溝池環市、竹木周布、塲圃築前、果園
樹後、舟車足以代步涉之難、使令足以息四體之役、養親
有兼珍之膳、妻孥無苦身之勞、良朋萃止、則陳酒肴以娛
之、嘉時吉日、則烹羔豚以奉之、踟躇畦苑、遊戲平林、濯清
水、追涼風、釣遊鯉、弋高鴻、諷於舞雩之下、詠歸高堂之上、
安神閨房、思老氏之玄虛、呼吸精和、求至人之彷彿、與達
者數子、論道講書、俯仰二儀、錯綜人物、彈南風之雅操、發
清商之妙曲、逍遙一世之上、睥睨天地之間、不受當時之
責、永保性命之期、如是則可以陵霄漢、出宇宙之外矣、豈

羨夫入帝王之門哉。又作詩二篇以見志。其辭曰。飛鳥遺
跡。蟬蛻亡殼。騰蛇棄鱗。神龍喪角。至人能變。達士拔俗。乘
雲無轡。騁風無足。垂露成幃。張霄成幄。沆瀣當餐。九陽代
燭。恒星豔珠。朝霞潤玉。六合之內。恣心所欲。人事可遺。何
爲局促。大道雖夷。見幾者寡。任意無非。適物無可。古來繞
繞。委曲如瑣。百慮何爲。至要在我。寄愁天上。埋憂地下。叛
散五經。滅棄風雅。百家雜碎。請用從火。抗志山栖。游心海
左。元氣爲舟。微風爲柁。敖翔太清。縱意容冶。尚書今荀彧
聞。繞名奇之舉。爲尚書郎。後參丞相曹操軍事。每論說古
今及時俗行事。恒發憤歎息。因著論名曰昌言。凡三十四

篇十餘萬言、獻帝遜位之歲、統卒、時年四十一、東海繆襲

常稱統才章足繼西京董賈劉楊、今簡拙其略曰、豪桀之
當天命者、未始有天下之分者也、無天下之分、故戰爭者
競起焉、于斯之時、並偽假天威、矯據方國、擁甲兵、與我角
才智、程勇力、與我競雌雄、不知去就、疑誤天下、蓋不可數
也、角知者皆窮、角力者皆負、形不堪復伉、勢不足復校、乃
始羈首係頸、就我之銜、繼耳、夫或曾爲我之尊長矣、或曾
與我爲等儕矣、或曾臣虜我矣、或曾執囚我矣、彼之蔚蔚
皆匈詈腹詛、幸我之不成、而以奮其前志、詎肯用此爲終
死之分邪、及繼體之時、民心定矣、普天之下、賴我而得生

育、由、我、而、得、富、貴、安、居、樂、業、長、養、子、孫、天、下、晏、然、皆、歸、心、
於、我、矣、豪、桀、之、心、既、絕、士、民、之、心、已、定、貴、有、常、家、尊、在、一、
人、當、此、之、時、雖、下、愚、之、才、居、之、猶、能、使、恩、同、天、地、威、侔、鬼、
神、暴、風、疾、霆、不、足、以、方、其、怒、陽、春、時、雨、不、足、以、喻、其、澤、周、
孔、數、千、無、所、復、角、其、聖、賁、育、百、萬、無、所、復、奮、其、勇、矣、彼、後、
嗣、之、愚、主、見、天、下、莫、敢、與、之、違、自、謂、若、天、地、之、不、可、亡、也、
乃、奔、其、私、嗜、騁、其、邪、欲、君、臣、宣、淫、上、下、同、惡、目、極、角、觝、之、
戲、耳、窮、鄭、衛、之、聲、入、則、耽、於、婦、人、出、則、馳、於、田、獵、澶、漫、彌、
流、無、所、底、極、遂、至、熬、天下、脂、膏、斲、生、人、之、骨、髓、怨、毒、無、聊、
禍、亂、並、起、中、國、擾、攘、四、夷、侵、叛、土、崩、瓦、解、一、朝、而、去、若、之、

爲我哺乳之子孫者、今盡是我飲血之寇讎也、至於運徙勢去、猶不覺悟、豈非富貴生不仁、沈溺致愚疾邪、又政之爲理者、取一切而已、非能斟酌賢愚之分、以開盛衰之數也、漢興以來、相與同爲編戶齊民、而以財力相君長者、世無數焉、而清潔之士、徒自苦於茨棘之間、無所益損於風俗也、豪人之室、連棟數百、膏田滿野、奴婢千羣、徒附萬計、船車賈販、周於四方、廢居積貯、滿於都城、琦賂寶貨、巨室不能容、馬牛羊豕、山谷不能受、妖童美妾、填乎綺室、倡謳妓樂、列乎深堂、賓客待見而不敢去、車騎交錯而不敢進、三牲之肉、臭而不可食、清醇之酎、敗而不可飲、睚眦則人

從其目喜怒則人隨其心此皆公侯之廣樂君長之厚實也苟能運智詐者則得之焉苟能得之者人不以爲罪焉源發而橫流路開而四通矣求士之舍榮樂而居窮苦棄放逸而赴束縛夫誰有爲之者邪夫亂世長而化世短亂世則小人貴寵君子困賤當君子困賤之時踞高天踏厚地猶恐有鎮厭之禍也逮至清世則復入於矯枉過正之檢老者耄矣不能及寬饒之俗少者方壯將復困於衰亂之時是使姦人擅無窮之福利而善士挂不赦之罪辜苟目能辯色耳能辯聲口能辯味體能辯寒溫者將皆以修潔爲諱惡設智巧以避之焉况有安而樂之者邪斯下

世人主一切之愆也。肉刑之廢，輕重無品，下死則得髡鉗，下髡鉗則得鞭笞，死者不可復生，而髡者無傷於人，髡笞不足以懲中罪，安得不至於死哉？夫雞狗之攘竊，男女之淫奔，酒醴之賂遺，謬誤之傷害，皆非植於死者也。殺之則甚重，髡之則甚輕，不制中刑以稱其罪，則法令安得不參差？殺生安得不過謬乎？今患刑輕之不足以懲惡，則假臧貨以成罪，託疾病以諱殺，科條無所準，名實不相應，恐非帝王之通法。聖人之良制也。易曰：陽一君二臣，君子之道也。陰二君一臣，小人之道也。然則寡者爲人上者也，衆者爲人下者也。一五之長，才足以長一五者也；一國之君，才

足以君一國者也、天下之王才足以王天下者也、愚役於智、猶枝之附幹、此理天下之常法也、制國以分人、立政以分事、人遠則難綏、事總則難了、今遠州之縣、或相去數百千里、當更制其境界、使遠者不過二百里、明版籍以相數、閱審什伍以相連結、限夫田以斷并兼、定五刑以救歿亡、益君長以興政理、急農桑以豐委積、去末作以一本業、敦教學以移性情、表德行以厲風俗、覈才藝以敘官宜、簡精悍以習師田、修武器以存守戰、嚴禁令以防僭差、信賞罰以驗懲勸、糾游戲以杜姦邪、察苛刻以絕煩暴、審此十六者、以爲政務操之有常、課之有限、安寧勿懈墮、有事不迫、

遽聖人復起不能易也向者天下戶過千萬除其老弱但戶一丁壯則千萬人也遺漏既多又蠻夷戎狄居漢地者尚不在焉丁壯十人之中必有堪爲其什伍之長推什長已上知百萬人也又十取之則佐史之才已上十萬人也又十取之則可使在政理之位者萬人也以筋力用者謂之人人求丁壯以才智用者謂之士士貴耆老充此制以用天下之人猶將有儲何嫌乎不足也故物有不求未有無物之歲也士有不用未有少士之世也或曰善爲政者欲除煩去奇并官省職爲之以無爲事之以無事何子之言云云也曰若是三代不足摹聖人未可師也君子用法

制而至於化、小人用法制而至於亂、均是一法制也、或以之化、或以之亂、行之不同也、苟使豺狼牧羊、豚盜跖主征、稅國家昏亂、吏人放肆、則惡復論損益之間哉、夫人待君子、然後化理、國待蓄積、乃無憂患、君子非自農桑以求衣食者也、蓄積非橫賊歛以取優饒者也、奉祿誠厚、則割剝貿易之罪、乃可絕也、蓄積誠多、則兵寇水旱之災、不足苦也、故由其道而得之、民不以爲奢、由其道而取之、民不以爲勞、天災流行、開倉庫以稟貸、不亦仁乎、衣食有餘、損靡麗以散施、不亦義乎、彼君子居位爲士民之長、固宜重肉累帛、朱輪四馬、今反謂薄屋者爲高、藿食者爲清、旣失天

地之性。又開虛僞之名。使小智居大位。庶績不咸。熙未必不由此也。得拘潔而失才能。非立功之實也。以廉舉而以貪去。非士君子之志也。夫選用必取善士。善士富者少而貧者多。祿不足以供養。安能不少營私門乎。從而罪之。是設機置弇以待天下之君子也。盜賊凶荒。九州代作。飢饉暴至。軍旅卒發。橫稅弱人。割奪吏祿。所恃者寡。所取者猥。萬里懸乏。首尾不救。徭役並起。農桑失業。兆民呼嗟。於昊天貧窮。轉死於溝壑矣。夫薄吏祿以豐軍用。緣於秦征諸侯。續以四夷。漢承其業。遂不改更。危國亂家。此之由也。周禮六典。冢宰貳王而理天下。春秋之時。諸侯明德者。皆一

卿爲政爰及戰國亦皆然也秦兼天下則置丞相而貳之以御史大夫自高帝逮于孝成因而不改漢之隆盛於是焉在夫任一人則政專任數人則相倚政專則和諧相倚則違戾和諧則太平之所興也違戾則荒亂之所起也光武皇帝愠數世之失權忿彊臣之竊命矯枉過直政不任下雖置三公事歸臺閣自此以來三公之職備員而已然政有不理猶加譴責而權移外戚之家寵被近習之豎親其黨類用其私人內充京師外布列郡顛倒賢愚貿易選舉疲驚守境貪殘牧民撓擾百姓忿怒四夷怨氣並作陰陽失和三光虧缺怪異數至蟲螟食稼水旱爲災此皆戚

宮之臣所致然也。反以策讓三公，至於歿免。又中世之選三公也，務於清慤謹慎，循常習故者，是婦女之檢柙，鄉曲之常人耳。惡足以居斯位邪？執既如彼，選又如此，而欲望三公勲立於國家，績加于生民，不亦遠乎？昔文帝之於鄧通，可謂至愛，而猶展申屠嘉之志。夫見任如此，則何患於左右小臣哉？至如近世，外戚宦豎請託不行，意氣不滿，立能陷人於不測之禍，惡可得彈正者哉？曩者任之重而責之輕，今者任之輕而責之重。昔賈誼感絳侯之困辱，因陳大臣廉耻之分，開引自裁之端。自此以來，遂以成俗。繼世之主，生而見之，習其所常，曾莫之悟。嗚呼！可悲夫！左手據

天下之圖、右手刎其喉、愚者猶知難之、况明喆君子哉、光武奪三公之重、至今而加甚、不假后黨以權、數世而不行、盖親疎之執異也、未若置丞相自總之、若委三公、則宐分任責成、夫使爲政者、不當與之婚姻、婚姻者、不當使之爲政也、如此在位、病人舉用失賢、百姓不安、爭訟不息、天地多變、人物多妖、然後可以分此罪矣、或曰、政在一人權甚重也、曰、人實難得、何重之嫌、昔者霍禹竇憲、鄧騭梁冀之徒、籍外戚之權、管國家之柄、及其伏誅、以一言之詔、詰朝而決、何重之畏乎、今夫國家漏神明於媒近、輸權重於婦黨、算十世而爲之者、八九焉、不此之罪、而彼之疑、何其詭

邪

蔡邕

邕字伯喈、陳畱人也、少博學、師事太傅胡廣、好辭章數術、天文、妙操音律、閑居翫古、不交當世、感東方朔客難、及楊雄、班固、崔駰之徒、設疑以自通、乃斟酌羣言、題其是而矯其非、作釋、誨以戒厲、云、建寧三年、辟司徒喬玄府、玄甚敬待之、拜郎中、校書東觀、遷議郎、邕以經籍去聖久遠、文字多謬、俗儒穿鑿、疑誤後學、乃與五官中郎將堂谿典、光祿大夫楊賜、諫議大夫馬日磳等、奏求正定六經文字、靈帝許之、邕乃自書於碑、使工鐫刻、立於大學門外、於是後儒

晚學咸取正焉。光和元年，置鴻都門學，畫孔子及七十二弟子像，其諸生皆勅州郡三公舉用，辟召或出爲刺史太守，入爲尚書侍中，乃有封侯賜爵者。士君子皆耻與之爲列。時妖異數見，人相驚擾。其年七月，上使中常侍曹節王甫就問災異及消改變故所宜施行。又特詔問邕曰：「比災變互生，未知厥咎。朝廷焦心，每詔羣公卿士，庶聞忠言，而各存括囊，莫肯盡心。邕經學深奧，故特遣稽問，宜披露所得，指陳政要，勿有依違。」自生疑諱，具對經術，以阜囊封上。邕對其末曰：「臣以愚戇，感激忘身，敢觸忌諱，手書具對。夫君臣不密，上有漏言之戒，下有失身之禍，願寢臣衣，無使

盡忠之吏受怨姦仇章奏帝覽而歎息因起更衣曹節於
後竊視之悉宣語左右事遂漏洩中常侍程璜遂使人飛
章言邕私事下邕於洛陽獄劾以大不敬棄市事奏中常
侍呂強愍邕無罪請之帝亦更思其章有詔減死一等與
家屬髡鉗徙朔方不得以赦令除楊球璜女夫也使客追
刺邕客感其義莫肯爲用球又賂其部主使加毒害所賂
者反以其情戒邕故邕得免焉在東觀時與盧植韓說等
撰補後漢記會遭事流離未及成書因陳奏其所著十意
分別首目連置章左帝嘉其才高會大赦乃赦邕還本郡
邕自徙及歸凡九月將就還路五原太守王智餞之酒酣

智起舞，邕不荅。智者，中常侍王甫弟也。素貴驕，慙於賓客。詬邕曰：「徒敢輕我。」邕拂衣而去。智銜之，密告邕。怨謫邕，慮卒不免，乃亡命江海，遠跡吳會。告其吳人曰：「吾嘗經會稽，高遷亭，見屋椽竹東間第十六，可以爲笛。取用，果有異聲。故伏滔長笛賦序云：『柯亭之觀，以竹爲椽。』邕取爲笛，竒聲獨絕。是也。往來依太山羊氏，積十二年在吳。吳人有燒桐以爨者，邕聞火烈之聲，知其爲良木，因請而裁爲琴。果有異音，而其尾猶焦。故時人名曰「焦尾琴」焉。邕初在陳留，其鄰人有以酒食召邕者，比往而主以醢，意有彈琴於屏間者。邕至門，潛聽之，曰：「以樂召我，而有殺心，何也？」遂反，將命。

者以告主人。主人追而問其故。邕具以告。彈者曰：「我向鼓絃，見螳螂方向鳴。蟬將去而未飛，螳螂爲之一前一却。吾心聳然，惟恐螳螂之失之也。」邕曰：「此足以當之矣。」靈帝崩，董卓爲司空，聞邕名，辟之，稱疾不就。卓大怒，詈曰：「我力能族人，邕不得已詣府，署祭酒，甚見敬重，補侍御史。又轉侍書御史，遷尚書。三日之間，周歷三臺，然卓多自恨用邕，謂從弟谷曰：『董公性剛而遂非，終難濟也。』吾欲東奔兖州，苦道遠難達，且遯逃山東，以待之，何如？」谷曰：「君狀異恒人，每行觀者盈集，以此自匿，不亦難乎？」邕乃止。及卓被誅，邕在司徒王允坐，殊不意言之而歎。允勃然叱之曰：「董卓國

之大賊君爲王臣所宜同忿而懷其私遇反相傷痛豈不
其爲逆哉卽收付廷尉邕陳謝乞黥首則足繼成漢史士
大夫多矜救之不能得太尉馬日磾馳往謂允曰伯喈曠
世逸才多識漢事當續成後史爲一代大典且忠孝素著
而所坐無名誅之恐大失人望允曰昔武帝不殺司馬遷
使作謫書流於後世方今國祚中衰神器不固不可令佞
臣執筆在幼主左右旣無益聖德復使吾黨蒙其訕議日
磾還而告人曰王公其不長世乎善人國之紀也制作國
之典也滅紀廢典其能久乎邕遂歿獄中時年六十一縉
紳諸儒莫不流涕北海鄭玄聞而歎曰漢世之事誰與止

之與兗州陳留之間聞者亦皆畫像而頌焉

禰衡

禰衡字正平平原人少有才辯而氣尚剛傲好矯時慢物建安初來遊許下始達潁州乃陰懷一刺刺字漫滅竟無所之是時許都新建四方賢士來集或問衡曰盍從陳長文司馬伯達乎衡曰吾焉能從屠沽兒游耶又問荀文若趙稚長衡曰文若可借面弔客稚長可使監厨請客惟善魯國孔融及弘農楊修嘗曰大兒孔文舉小兒楊德祖餘子碌碌莫足數融亦深愛其才衡始弱冠而融年四十遂與爲友數稱述於曹操操欲見之而衡素輕操自稱狂病

不甯往而數有傲言操懷怒而以其才名不欲殺之聞衡善擊鼓乃召爲鼓吏本欲辱衡反爲衡所辱孔融退而數之曰正平大雅固當爾邪衡因許往融復見操說衡願得自謝操喜勅門者有客便通待之極晏衡乃著布單衣疎巾手持三尺棧杖坐大營門以杖箠地大罵吏白外有狂生坐於營門言語悖逆請收案罪操怒謂融曰禰衡豎子孤殺之猶雀鼠耳顧此人素有虛名遠近將謂孤不能容人今送與劉表視當何如於是遣騎送去臨發衆人爲之祖道先供設於城下乃更相戒曰禰衡禮今因其後到當以不起折之及衡至衆人皆坐不起衡入而大號

衆問其故衡曰坐者爲冢臥者爲屍屍冢之間能不悲乎
劉表嘗與諸文士共草奏並極才思衡曰省未周因

毀抵地表大駭衡乃從求筆札須臾成文兼美表復

大喜益重衡衡復侮慢表表耻之轉送至江夏江夏太守

黃祖亦善待衡衡爲作書記祖長子射爲章陵太守與衡

遊共讀蔡邕所作碑射愛其辭旣還恨未得繕寫衡曰吾

雖一覽猶能識之唯其中石缺二字爲不明耳因書出及

射馳使寫碑還校如之以是射益歎伏焉射時大會賓客

人有獻鸚鵡者射酌酒而請曰願先生賦之衡攬筆而作

文無加點辭采甚麗後黃祖大會賓客而衡言不遜祖慙

訶之、衡更熟視曰、死公云等道祖大怒、令五百將出、便欲
加箠、衡大罵、祖恚甚、遂殺之、射徒跣來救、已不及矣、死時
年二十六、其文亦亡失、可、惜、

